

王 净 编

# 全編宋詞

陆



延边人民出版社

# 全编宋词

---

王 诤 等编

⑥

延边人民出版社

江浦画难成。我向其间泛叶，终朝露渚风汀。老来心事最关情。不堪三弄笛，吹作断肠声。

### 鞦 绣 球 和康伯可韵

流水奏鸣琴，风月净、天无星斗。翠岚堆里，苍岩深处，满林霜膩，暗香冻了，那禁频嗅。马上再三回首。因记省、去年时候。十分全似，那人风韵，柔腰弄影，冰腮退粉做成清瘦。

### 眼 儿 媚

南枝消息杳然间。寂寞倚雕栏。紫腰艳艳，青腰袅袅，风月俱闲。佳人环佩玉珊珊。作恶探花还。玉纤捻粟，樱唇呵粉，愁点眉弯。

### 菩 萨 蛮

日高犹恋珊瑚枕。羞红不忿花如锦。双燕运芹泥。燕归人未归。纵饶梳洗罢。朱户何曾跨。寂寞小房栊。回文和泪封。

### 鹧 鸪 天

落魄东吴二十春。风流诗句得清新。今年却恨花星照，再见温卿与远真。分楚佩，染巫云。赤绳结得短花茵。若非京口初相识，安得毗陵作故人。

### 浪 淘 沙

绿树转鸣禽。已是春深。杨花庭院日阴阴。帘外飞来双语燕，不寄归音。旧事懒追寻。空惹芳心。天涯消息远沈沈。记得年时中酒后，直至而今。

### 谒 金 门

春睡足。帘卷翠屏山曲。芳草沿阶横地轴。垂杨相映绿。暗忆旧欢难续。又是禁烟传烛。陌上踏青新结束。秋千谁共促。

### 侍 香 金 童

一种春光，占断东君惜。算桃李、昭华争并得。粉膩酥融娇欲滴。

端的尊前，旧曾相识。向夜阑、酒醒霜浓寒又力。但只与、冰姿添夜色。绣幕银屏人寂寂。只许刘郎，暗传消息。

### 菩萨蛮

新晴庭户春阴薄。东风不度重帘幕。第几小兰房。雏莺初弄黄。悄寒春未透，不解寻花柳。只恐渐春深。愁生求友心。

### 清平乐

紫箫声断。窗底春愁乱。试著春衫羞自看。窄似年时一半。一春长病厌厌。新来愁病重添。香冷倦熏金鸭，日高不卷珠帘。

### 好事近

齿颊带余香，〔馨〕(馨)咳总成珠玉。剪碎袖罗花片。点金觥春绿。玉鱼花露自清凉，涓涓在郎腹。犹胜望梅消渴，对文君眉蹙。

### 品令

好事客。官商内、吟得风清月白。主人幸有豪家意，后堂煞有春色。花压金翘相映，酒满玉纤无力。你若待我些儿酒，尽吃得、尽吃得。

### 武陵春

落了丹枫残了菊，秋色苦无多。谁唤西风泣泪罗，吹恨入星河。

碧陆校：应“碧”字上下脱一字 枝头金粟闹，曾撼翠云窝。重揉檀英忆两娥。无奈冷香何。

## 罗愿

愿字端良，号存斋，歙县人。生于绍兴六年（一一三六）。以荫补承务郎监临安新城税。乾道二年（一一六六），登进士第。任赣州通判。秩满，差知南剑州，改知鄂州。淳熙十一年（一一八四）卒，年四十九。所著有尔雅翼及鄂州小集。

## 水调歌头 中秋和施司谏

秋宇净如水，月镜不安台。郁孤高处张乐，语笑脱氛埃。檐外白毫千丈，坐上银河万斛，心境两佳哉。俯仰共清绝，底处着风雷。问天公，邀月姊，愧凡才。婆娑人世，羞见蓬鬓漾金罍。来岁公归何处，照耀彩衣簪橐，禁直且休催。一曲庾江上，千古继韶孩。

## 失调名

九月江南秋色，黄雀雨，鲤鱼风。

## 楼 钥

钥字大防，鄞县人，锜从弟。生于绍兴七年（一一三七）。隆兴元年（一一六三）进士，累官太府宗正寺丞，出知温州。光宗立，除考功郎，改国子司业，擢起居郎，迁给事中。与韩侂胄不合，以显谟阁学士提举江州太平兴国宫，寻知婺州，移宁国府罢，夺职。侂胄诛，起为翰林学士，迁吏部尚书，除端明殿学士、签书枢密院事。升同知，进参知政事。累疏求去，除资政殿学士，进大学士，提举万寿观。嘉定六年（一二一三）卒，年七十七，赠少师、谥宣献。有攻愧集，词附。

## 醉翁操 七月上浣游裴园

茫茫。苍苍。青山绕、千顷波光。新秋露荷吹香。悠扬心地悠然，生清凉。古岸摇垂杨。时有白鹭飞来双。隐君如在，鹤与翱翔。老仙何处，尚有流风未忘。琴与君兮宫商。酒与君兮杯觞。清欢殊未央。西山忽斜阳。欲去且徜徉。更将霜鬓临沧浪。

## 又 和东坡韵咏风琴

泠然。清圆。谁弹。向屋山。何言。清风至阴德之天。悠扬余响婵娟。方昼眠。迴立八风前。八音相宣知孰贤。有时悲壮，铿若龙泉。有时幽杳，仿佛猿吟鹤怨。忽若巍巍山巅。荡荡几如流川。聊将娱暮年。听之身欲仙。弦索满人间。未有逸韵如此弦。

## 孝宗皇帝虞主自浙江还重华宫鼓吹导引曲

孝宗纯孝，前圣更何加，高蹈处重华。丹成仙去龙輶远，越岸暮山遐。波臣先为卷寒沙。来往护灵槎。九虞礼举神祇乐，万世佑皇家。

## 孝宗皇帝神主自重华宫至太庙祔庙鼓吹导引曲

吾皇尽孝，宗庙务崇尊。钜典备弥文。巍巍东向开基主，七世祔神孙。追思九闰整乾坤。环宇慕洪恩。从今密迩高宗室，千载事如存。

## 张 良 臣

良臣字武子，一字汉卿，号雪窗，大梁（今河南省开封）人，家拱州，避地家鄞。隆兴元年（一一六三）进士。淳熙末卒，官止监左藏库。有雪窗集，今不传。

## 失 调 名

昨日荳花篱下过，忽然迎面好风吹。独自立多时。

## 西 江 月

四壁空围恨玉，十香浅捻啼绡。殷云度雨井桐凋。雁雁无书又到。别后钗分燕股，病余镜减鸾腰。蛮江豆蔻影连梢。不道参横易晓。

## 采 桑 子

佳人满劝金蕉叶，夜玉春温。别后黄昏。燕子楼高月一痕。年年依旧梨花雨，粉泪空存。流水孤村。不著寒鸦也断魂。

## 舒 邦 佐

邦佐字辅国，后更字平叔，隆兴府靖安县人。绍兴七年（一一三七）生。淳熙八年（一一八一）进士，授鄂州蒲圻簿，改潭州善化簿，迁衡州录事参军。嘉定七年（一二

一四)卒,享处七十有八。有双峰猿稿。

### 水调歌头 寿衡守季国正

问讯金华伯,自是地行仙。只为朱轮画戟,句引到湘川。用个狷鸥心地,做就烹鲜时政,民化我何言。但贵衡阳纸,纸落尽云烟。对湖天,梅索笑,月还圆。旧时岳生申甫,重到是前缘。快洗瑶觥一醉,唤个鹤仙起舞,骑取上花砖。春秋更多少,庄木八千年。

## 张孝忠

孝忠字正臣,历阳(今安徽省和县)人。隆兴元年(一一六三)进士。曾知郴州。开禧初,守荆门。三年(一二〇七),京西运判。嘉定元年(一二〇八),直显谟阁,落职放罢。八年(一二一五),新知金州,放罢。

### 杏花天 刘司法喜咏北湖次其韵

爱寻水竹添情况。任云卧、溪边石上。衔杯乐圣成游荡。不为弓弯舞样。北湖迥、风飘彩舫。□笑击、凭夷薄相。致身福地何萧爽。莫道居夷太枉。

又

看花随柳湖边去。似邂逅、水晶宫住。刘郎笔落惊风雨。酒社诗盟心许。玉关外、不辞马武。便好展、云霄稳步。郴江自绕郴山路。欲向功名何处。

### 破阵子 北湖次唐教授韵

占气中涵清淑,徵诗古富篇章。杖履闲随鱼□乐,怀抱清如湖水凉。何殊吴越乡。风柳春容袅袅,水花月影汪汪。且把清尊浇磊磊,莫为浮名愁肺肠。星星白发长。

### 玉楼春 泛北湖次唐教授韵

绿波春早青烟暮。翠幕船如天上去。深杯浊酒醉贤人,隔岸幽花怜静女。浮云散乱流萍聚。恨满韩张离合处。欲招骑龙帝乡人,来咏叉鱼春岸句。

## 鹧 鸪 天

豆蔻梢头春意浓。薄罗衫子柳腰风。人间乍识瑶池似，天上浑疑月殿空。眉黛小，髻云松。背人欲整又还慵。多应没个藏娇处，满镜桃花带雨红。

## 菩 萨 蛮 即席次王华容韵

娇红隐映花稍雾。金莲容与歌声度。得句写香笺。江山此意传。醉当春好处。不道因风絮。去并锦闌眠。青绡被底仙。

## 西 江 月 即席次王华容韵

堂上簪缨交错，花间帘幕高张。与君一咏一飞觞。莫笑诗狂饮畅。满路光风转蕙，吟边宫柳斜行。新词妙绝动宫墙。紫诰黄麻天上。

## 霜 天 晓 角 汉阳王守席上

楚山浮碧。江汉无终极。鄂渚几行云树，天何意、限南北。使君觴醉客。健倒曾何惜。三国英雄谁在，斜阳外、尽陈迹。

## 方 有 开

有开字躬明，号堂溪，歙州（今安徽省歙县）人。登隆兴元年（一一六三）进士，授南丰尉。屡迁司农丞、转运判官，兼庐州帅。有堂溪集，不传。

## 点 绛 唇 钓台

七里滩边，江光漠漠山如戟。渔舟一叶。径入寒烟碧。笑我尘劳，羞对双台石。身如织。年年行役。鱼鸟浑相识。

## 满 江 红 钓台

跳出红尘，都不顾、是非荣辱。垂钓处、月明风细，水清山绿。七里滩头帆落尽，长山泆口潮回速。问有谁、特为上钩来，刘文叔。貂蝉贵，无人续。金带重，难拘束。这白麻黄纸，岂曾经目。昨夜客星



侵帝座,且容伸脚加君腹。问高风、今古有谁同,先生独。

## 许 及 之

及之字深甫,永嘉人。隆兴元年(一一六三)进士。淳熙十四年(一一八七),宗正寺簿。十五年(一一八八),右拾遗。庆元元年(一一九五),权礼部侍郎。三年(一一九七),给事中。四年(一一九八),自吏部尚书除同知枢密院事。嘉泰二年(一二〇二),参知政事。三年(一二〇三),除知枢密院事兼参知政事。四年(一二〇四)罢。开禧三年(一二〇七),泉州居住。嘉定二年(一二〇九)卒。有涉斋集。

### 贺 新 郎

旧俗传荆楚。正江城、梅炎藻夏,做成重午。门艾钗符关何事,付与痴儿骏女。耳不听、湖边鼙鼓。独炷炉香薰衣润,对潇潇、翠竹都忘暑。时展卷,诵骚语。新愁不障西山雨。问楼头、登临倦客,有谁怀古。回首独醒人何在,空把清尊酹与。漾不到、潇湘江渚。我又相将湖南去,已安排、吊屈嘲渔父。君有语,但分付。

## 傅 大 询

大询字公谋,号铃冈,宜春人。

### 水 调 歌 头

草草三间屋,爱竹旋添栽。碧纱窗户,眼前都是翠云堆。一月山翁高卧,踏雪水村清冷,木落远山开。唯有平安竹,留得伴寒梅。唤家童,开门看,有谁来。客来一笑,清话煮茗更传杯。有酒只愁无客,有客又愁无酒,酒熟且徘徊。明日人间事,天自有安排。

### 锦 堂 春 寿许宰

梅要疏开,雪教迟下,怕他寒入江天。有月桥仙客,相伴婵娟。巷陌升平气象,一时都在鸣弦。望东家锦里,雁到云边。书到云边。

尊前翠眉环唱,道新腔字稳,花折声圆。此去凤池游戏,碧波添插金

莲。看长生叶上，龟寿千年。人寿千年。

### 柳 梢 青 庆叶丞

春到江南，今年寒少，早有疏梅。相伴双松，吟哦风月，着意花开。  
天香甚处安排。便何似、调羹去来。劲节仙姿，玉堂难老，身在蓬莱。

### 念 奴 娇

江梅破腊，把一枝来报，□春消息。锦帐银瓶龙麝暖，画烛光摇金碧。  
两径桃花，一溪流水，路入神仙宅。云裳羽佩，洞天相会今夕。

堂下乐问灵鼈，玉人清唱，舞袖低回雪。富贵风流须道是，天上人间难得。  
玉镜台边，琼浆盏畔，共说春心切。百年偕老，凤凰楼上风月。

### 行 香 子 寿邓宰母 二月初五

玉佩簪纓。罗林生尘。问何时、来到湘滨。尧蓂五叶，二月阳春。  
一霎时风，一霎时雨，一霎时晴。有子鸣琴。有路登瀛。戏斑衣、温酒重斟。  
蟠桃难老，相伴长生。一千年花，一千年果，一千年人。

## 刘 德 秀

德秀字仲洪。丰城人。隆兴元年(一一六三)进士。淳熙八年(一一八一)，户部搞赏酒库所干办公事。庆元元年(一一九五)，右正言。二年(一一九六)，谏议大夫。开禧元年(一二〇五)，签书枢密院事。嘉定元年(一二〇八)卒。有默轩词，不传。

### 贺 新 郎 西湖

雨沐秋容薄。莹湖光、琉璃千顷，浪平如削。步绕湖边佳绝处，时涌琼楼珠阁。记一一、经行皆昨。十万人家空翠里，借姮娥、玉鉴相依约。卷雾箔，飞烟幕。  
天机云锦才收却。放芙蓉、岸花十里，翠红成幄。向晚买舟撑月去，笑引银汉共酌。醉欲起、骑鲸碧落。试唤坡仙哦妙句，问淡妆、此夕如何著。只云月，是梳掠。

## 吴 鎰

鎰字仲权，自号敬斋，崇仁人。隆兴元年（一一六三）进士。淳熙中，知宜章。十六年（一一八九），秘书省正字。知武冈军，司封郎中，广西运判，湖南转运判官。庆元三年（一一九七）卒，有云岩集，敬斋词，俱不传。

## 水调歌头 柳州北湖

澄彻北湖水，圆镜莹青铜。客槎星汉天上，隐隐暗朝通。六月浮云落日，十顷增冰积雪，胜绝与谁同。罗袜步新月，翠袖倚凉风。子韩子，叫虞帝，傲祝融。御风凌雾来去，邂逅此从容。欲问骑骢何处，试举叉鱼故事，惊起碧潭龙。乞我飞霞佩，从子广寒宫。

又

三楚上游地，五岭翠眉横。杜诗韩笔难尽，身到眼增明。最好流泉百道，潋潋绕城紫市，唯见洛阳城。化鹤三千岁，橘井尚凄清。阆风客，紫贝阙，白玉京。不堪天上官府，时此驻霓旌。岁晚朔云边雪，压尽蛮烟瘴雨，过雁落寒汀。况有如泉酒，细与故人倾。

## 林 淳

淳字太冲，三山（即今福州）人。乾道八年（一一七二），以奉议郎为泾县令，修复古塘，民多称之。（淳熙三山志有长溪林淳，隆兴元年进士，潮阳尉，或即一人。）

## 水调歌头 温陵东湖次陈休斋体仁韵

潇洒东湖上，夜雨洗清秋。朝来尘霁，凝望千里兴悠悠。山色揉蓝深染，波影青铜新铸，□冷翠光浮。蓑笠真吾事，聊整钓鱼钩。坐中客，凌王谢，更风流。一觴一咏，豪俊谈笑气吞牛。花月连环长好，到处名园池□，遇景且遨游。试问陶元亮，底事赋归休。

## 鹧鸪天 西湖

天近祇知雨露浓。湖山无日不春风。闲花野草皆掀舞，曾在君王顾盼中。时易得，会难逢。朝为逆旅暮三公。蛟龙得雨飞无便，鸡犬腾云凤有动。

## 柳梢青

富贵园林。清虚清馆，随意登临。物外风光，云明花媚，鸟语烟深。徐徐缓辔微吟。迤逦度、松间柳阴。览遍幽奇，小舟归晚，月映波心。

## 浣溪沙 忆西湖

却忆西湖烂漫游。水涵山影翠光浮。轻舟短棹不惊鸥。带露精神花妩媚，依风情态柳温柔。莺歌燕语巧相留。

## 水调歌头 次赵帅开西湖韵

湖波涨新绿，环绕越王山。棠斋清昼余暇，赢得静中观。四面屏围碧玉，十里障开云锦，冰鉴倒晴澜。目送孤鸿远，心与白鸥闲。隘游人，喧鼓吹，杂歌欢。晓天澄霁，花羞柳妒怯春寒。好在风光满眼，只恐阳春有脚，催诏下天关。剩写鹅溪幅，归去凤池看。

又

疏水绕城郭，农利遍三山。使君重本，雅声初不在游观。化出玉壶境界，挥洒锦囊词翰，笔下涌波澜。天巧无余蕴，意匠自舒闲。拥鳌头，民同乐，颂声欢。养花天气，云柔烟腻护朝寒。桃李满城阴合，杨柳绕堤绿暗，幽鸟语间关。似诉风光好，留与后人看。

又

螺水亘千古，鳌顶冠三山。年丰帅阃尘静，栏槛纵遐观。四望潮登浦溆，万顷绿浮原野，堤岸溢波澜。吠浚皆沾足，日永桔槔闲。肆华筵，鱼鸟乐，众宾欢。良辰好景，年年莫放此盟寒。且念新潮遗爱，莫作故园遐想，到处是乡关。勋业知非晚，聊把镜频看。

## 菩萨蛮

鹅溪净称烟笼月。澄心白称光浮雪。净白两俱宜。天然浓淡枝。花光神意远。吮墨含毫浅。依约有香来。春风随手开。

## 减字木兰花 郑尚书席上借前韵

嫣然笑粲。醉靥融滋春意烂。侍宴终宵。欢动帘帏酒易消。尊前狂客。惊见蕊仙新谪籍。珠阁深关。丹就同归海上山。

又

烛花呈灿。瑞气满筵春欲烂。月色中宵。疑是阶前雪未消。  
骚人词客。魂断蜡梅香已籍。谁更情关。一点新愁入远山。

### 浣溪沙 郑尚书席上再作

冒雪休寻访戴船。红炉胜燕宝香然。阁儿煨暖两三椽。更  
有玉杯传素手，梅花相对两争妍。停杯听唱月娟娟。

## 廖行之

行之字天民，其先延平人，徙衡州。绍兴七年（一一三七）生。淳熙十一年（一一八四）进士。岳州巴陵尉，改宁乡主簿。淳熙十六年（一一八九）卒，年五十三。有省斋集。

### 洞仙歌 寿老人

虞弦挥按，甫奏薰风曲。两两尧蓂长新绿。揖鳌峰、连雁峤，辘轳圆融，总里许、北郭门围全属。年年才见夏，喜溢粉榆，龙穴霏烟霭晴谷。向氤氲和气里，岁奉瑶觞，试屈指、几阅梅林初熟。待一品官高见玄孙，算八十彩衣，更饶遐福。

### 念奴娇 寿四十叔

薰风庭院，报槐阴拥翠，池波凝绿。瑞气葱葱浮燕寝，羽仗霓旌相属。鸞鸞开祥，长庚入梦，诧列仙图篆。林泉高迈，肯应轩冕尘俗。

好是妙舞清歌，浮瓜沈李，荐杯中醺醖。鹊尾炉生香篆细，又作如何祈祝。试问蓬莱，丹崖胜处，几摘蟠桃熟。东方何在，凛然能继高躅。

### 贺新郎 和狄志父秋日述怀

玉宇□蓬户。渺凉声、箭移梧井，乱零枫浦。得得西山朝来爽，碧瘦千崖万树。清兴在、烟霞深处。拄笏风流今谁是，但闻鸡、夜半犹狂舞。试举看，渠多许。青云万里君夷路。肯区区、辘张兔穴，沈迷金坞。流水高山真难料，休把朱弦浪抚。任展转、翻云覆雨。且对佳时随意乐，更从今、莫问惊人句。算万事，总天赋。

## 又 赋木犀

修月三千户。拥冰轮、同游碧落，问津牛浦。上界真仙多才思，乞与瑶阶玉树。渺万里、人间何处。云叶依依分清荫，忆当时、掩映霓裳舞。算万木，宁如许。年年萧爽幽岩路。倚西风，吹香金粟，超然云坞，一洗纷纷凡花尽，堪写清商对抚。为豁散、蛮烟瘴雨。脱俗高标谁能领，向骚人、正欠题新句。须大手，与君赋。

## 水调歌头 寿外舅

林梢挂弦月，江路粲寒梅。一年清绝，好是造物巧安排。今日不知何日。佳气更随喜气，满室已春回。欢事一时足，黄色两眉开。

紫髯公，平日事，亦高哉。都将功业，分付兰玉满庭阶。慈爱浑嗤张傅，信义更高吴季，别是一襟怀。岁岁长生酒，剩□紫霞杯。

## 又 寿长兄

天下伟人物，荆楚号名流。幅员千里，英气磅礴岳南州。雁峤高参翼轸，石鼓下盘朱府，衮衮应公侯。常记生申旦，明日是中秋。挹明月，翳翔凤，驷飞虬。东南一尉，何事三载漫淹留。谈笑洞庭青草，从此阆风阆圃，高处看鳌头。更种阶庭玉，慈母念方稠。

## 又 寿汪监

祥起玉龙甲，庆衍紫枢垣。奎文得岁，佳气磅礴斗牛间。天意方扶兴运，贤业更看奕世，衮衮照英躔。四海具瞻久，膏泽满湘川。岁六月，苏大旱，作丰年。喁喁百万生齿，何处不沾恩。此是鸿钧事业，那更青毡步武，早晚即调元。混一车书了，还领赤松仙。

## 又 寿□守

黄色起犀表，紫绶照金章。两朝著德，应是南国旧龚黄。曾上方壶蓬岛，万里鲸波不作，炎海赖清凉。缓造鹄鸿地，高卧水云乡。近新来，春色好，遍潇湘。不知今日何日，佳气拥高堂。竞把芳尊为寿，细祝遐龄不老，福祿未渠央。国栋欠元老，仙桂看诸郎。

## 又 寿邓彦峰

凉吹起空阔，疏雨敛轻阴。潇湘江上秋色，佳处不胜清。拄笏西山一望，气与千崖高爽，天意属奇英。威风下瑶阙，丹桂矗云根。汉元侯，流德厚，在云孙。金昆玉季，曾共接武上青云。堂上瑶池仙

姥，庭下芝兰玉树，好事萃于门。剩讲经纶事，早晚自公卿。

又 寿欧阳景明

苍立箴龙秀，青压雨梅肥。清和天气，无限佳景属斯时。试听虞弦初理，便有薰兮入奏，风物正熙熙。此时定何日，香篆袅金猊。记当年，萸两荚，应熊黑。男儿壮志，端在伊傅与皋夔。况是从容书史，养就经纶功业，早晚帝王师。但了公家事，方与赤松期。

又 寿武公望

韩国武中令，公望乃云孙。平生壮志，凛凛长剑倚天门。郁积胸中谋虑，慷慨尊前谈笑，袖手看风云。唾手功名事，诗句自朝昏。况高怀，吾所敬，果难能。千金生产，一笑推尽与诸昆。所至才成辄去，不为区区芥蒂，此意有谁论。且举杯中酒，今日是生辰。

沁园春 和苏宣教韵

直下承当，本来能解，莫遣乾休。算如今蹉过，峥嵘岁月，分阴可惜，一日三秋。闹里偷声，日中逃影，用尽机关无少留。争知道，是沍生即水，水外无沍。世人等是悠悠。谁著个工夫向里求。但掩耳窃钟，将泥洗块，觅花空里，舐蜜刀头。何以忙中，尻舆浸假，邀取三彭同载游。真如界，向毗卢顶上，荐取无忧。

千秋岁 寿外姑

腊余时候，天意收寒早。梅信动，春先到。晓来湘水上，有底风光好。春有意，惯随仙仗来蓬岛。一念到人间，依约瑶池道。心好在，慈为宝。蟠桃多岁月，不数如瓜枣。千岁也，朱颜绿鬓人难老。

青玉案 书七里桥店

片帆稳送扁舟去。又还踏、江湖路。回首京城旧游处。断魂南浦，满怀装恨，别后凭谁诉。长歌击剑论心素。有志功名未应暮。自诵百僚端复许。归来犹记，东坡诗语，但草凌云赋。

又 重九忆罗舜举

家山此去无多路。久没个、音书去。一别而今佳节度。黄花开未，白衣到否，篱落荒凉处。峥嵘岁月还秋暮。空腹便便无好句。菊意愆期浑未许。那堪惹恨，年来此日，长得潇潇雨。

## 满庭芳 丁未生朝和韵酬表弟武公望

五甲科名，半生蹭蹬，胸中可谓忘奇。荣华外物，算岂是人为。自有吾身事业，最难得、□养亲时。萱堂好，紫鸾重诰，寿与岳山齐。

世间，欢乐事，争名蜗角，伐性蛾眉。漫须臾变化，苍狗云衣。那似千秋寿母，功名事、分付吾儿。从今去，捧觴戏彩，双绶更相宜。

## 凤栖梧 寿长嫂

吾母慈祥膺上寿。福庇吾家，近世真希有。丘嫂今年逾六九。康宁可嗣吾慈母。我愿慈闱多福厚。更祝遐龄，与母齐长久。鸾诰联翩双命妇。华堂千岁长生酒。

## 又 寿外舅

破腊先春梅有意。管领年华，总在清香蕊。不逐浮花红与紫。岁寒来寿仙翁醉。衮衮诸公名又利。谁似高标，摆却人间事。长对南枝添兴致。尊前好在三千岁。

## 临江仙 元宵作

春意茫茫春色里，又还几度花期。淡晴时候尽融怡。梅腮翻白后，柳眼弄青时。正是江城天气好，楼台灯火星移。相逢无处不相宜。轻狂行乐处，明月夜深归。

## 西江月 舟中作

绀滑一篙春水，云横几里江山。一番烟雨洗晴岚。向晓碧天如鉴。客枕漫劳魂梦，心旌长系乡关。封姨慳与送归帆。愁对绿波肠断。

## 又 寿友人

试数阶蓂有几，昨朝看到今朝。南薰早动舜琴谣。端为熊黑梦兆。学粹昔人经制，文高古乐箫韶。天风从此上扶摇。回首不劳耕钓。

## 鹧鸪天 寿四十舅

飞尽林花绿叶丝。十分春色在茶蘼。多情几日风朝雨，留恋东风



未许归。天意好，与君期。如今且醉□蛾眉。明年上国春风里，赏遍名花得意时。

又 寿外舅

腊月今朝恰一句。梅花开遍陇头春。篆烟起处人称寿，从昔家和福自生。新喜事，得佳姻。贤郎顺妇正充庭。从今更祝千千岁，要与邦人作典型。

又 寿外姑

细数元正隔两朝。眼看杨柳又新条。岁寒独有江梅耐，曾伴瑶池下绛霄。香篆袅，烛花烧。团栾喜气沸欢谣。慈祥自是长生乐，不用春醪秘与椒。

又 代人寿欧阳景明

送了春归雨未收。雨肥梅子满枝头。心知办此和羹品，正为和羹国手谋。冀两荚，岁千秋。崧高神气禀公侯。好将一卷周公礼，起佐皇家定九州。

又 寿叔祖母

曾宴瑶池万玉宫，鸾骖此日自从容。杓携鹑首坤维外，岁在降娄虎坎中。生指李，寿方瞳。云仍今有鹊巢风。传家自得长年诀，安用人祈鹤与松。

又 寿外舅

兰谷清香入岭梅。多根应尔暖先回。腊前似得真消息，争逐尧蓂十叶开。春满室，酒盈杯。百花宁许到尊罍。仙姿要是仙家伴，长为遐龄岁一来。

又 寿邓孺人

畴昔君王庆诞辰。欢传金母下瑶城。只应仙子陪仙仗，却向人间作寿星。萧史伴，更和鸣。殷勤好嗣太夫人。直须同饮长生酒，剩看芝兰照谢庭。

卜算子 元夜观灯

云破露新晴，月上输清气。最是江城有底佳，灯火人烟沸。行乐尽欢娱，眼界尤妍媚。多少江滨解佩人，邂逅无穷意。